



ქალაქ თბილისის მუნიციპალიტეტის საკრებულო



ბ ა ნ კ ა რ ბ უ ლ ე ბ ა № 570

2 დეკემბერი
“ --- ” ----- 2021 წ

ქ. თბილისი

ქალაქ თბილისის მუნიციპალიტეტსა და ევროპის რეკონსტრუქციისა და განვითარების ბანკს (EBRD) შორის „თბილისის ავტობუსის პროექტი ფაზა III“-ს ფარგლებში პროექტის მხარდაჭერის ხელშეკრულების ხელმოწერაზე თანხმობის მიცემის შესახებ

საქართველოს ორგანული კანონის - „ადგილობრივი თვითმმართველობის კოდექსი“ 61-ე მუხლის მე-2 პუნქტის, მე-100 მუხლის მე-3 პუნქტების და ქალაქ თბილისის მუნიციპალიტეტსა და ევროპის რეკონსტრუქციისა და განვითარების ბანკს („EBRD“) შორის „თბილისის ავტობუსის პროექტი - ფაზა III“-ს შესახებ პროექტის მხარდაჭერის ხელშეკრულების ხელმოსაწერად ქალაქ თბილისის მუნიციპალიტეტის საკრებულოდან თანხმობის მიღების თაობაზე“ ქალაქ თბილისის მუნიციპალიტეტის მთავრობის 2021 წლის 22 ნოემბრის №26.1615.1809 განკარგულების საფუძველზე, ქალაქ თბილისის მუნიციპალიტეტის საკრებულომ დაადგინა:

1. მიეცეს თანხმობა ქალაქ თბილისის მუნიციპალიტეტის მთავრობას ქალაქ თბილისის მუნიციპალიტეტსა და ევროპის რეკონსტრუქციისა და განვითარების ბანკს („EBRD“) შორის „თბილისის ავტობუსის პროექტი - ფაზა III“-ს შესახებ პროექტის მხარდაჭერის ხელშეკრულების ხელმოწერაზე „ქალაქ თბილისის მუნიციპალიტეტსა და ევროპის რეკონსტრუქციისა და განვითარების ბანკს („EBRD“) შორის „თბილისის ავტობუსის პროექტი - ფაზა III“-ს შესახებ პროექტის მხარდაჭერის ხელშეკრულების გაფორმების მიზნით, ქალაქ თბილისის მუნიციპალიტეტის საკრებულოდან თანხმობის მიღების თაობაზე“ ქალაქ თბილისის მუნიციპალიტეტის მთავრობის 2021 წლის 22 ნოემბრის №21.1615.1809 განკარგულების დანართით წარმოდგენილი ხელშეკრულების შესაბამისად.

2. განკარგულება, ერთი თვის ვადაში, შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (მისამართი: ქ. თბილისი, დავით აღმაშენებლის ხეივანი, №64), კანონმდებლობით დადგენილი წესით.

ქალაქ თბილისის მუნიციპალიტეტის
საკრებულოს თავმჯდომარის
მოვალეობის შემსრულებელი

გიორგი ახვლედიანი

(საოპერაციო ნომერი 52565)

პროექტის მხარდაჭერის ხელშეკრულება
(თბილისის ავტოზუსების პროექტის ფაზა III)

ქალაქ თბილისის მუნიციპალიტეტსა

და

ევროპის რეკონსტრუქციისა და განვითარების ბანკს

შორის

თარიღი 2021 წლის _____

სარჩევი

მუხლი I - სტანდარტული პირობები და ტერმინების განმარტებები.....	1
ნაწილი 1.01. სტანდარტული პირობების გათვალისწინება	1
ნაწილი 1.02. ტერმინების განმარტებები.....	1
ნაწილი 1.03. ინტერპრეტაცია	3
ნაწილი 1.04. დასტური	3
II - მხარდაჭერის ვალდებულებები.....	3
ნაწილი 2.01 ქალაქ თბილისის მუნიციპალიტეტის მიერ ნაკისრი მხარდაჭერის ვალდებულებები	3
ნაწილი 2.02. ფინანსური ვალდებულებები.....	5
ნაწილი 2.03. ქვესასესხო ხელშეკრულება	5
ნაწილი 2.04. საჯარო მომსახურების კონტრაქტი.....	5
მუხლი III - ფინანსური და საოპერაციო ვალდებულებები.....	5
ნაწილი 3.01. ფინანსური აღრიცხვიანობა და ანგარიშები	5
მუხლი IV- სხვადასხვა.....	6
ნაწილი 4.01. ეფექტურობა.....	6
ნაწილი 4.02. ხელშეკრულების მოქმედების შეწყვეტა.....	6
ნაწილი 4.03. ხელშეკრულების გაუქმება და შეჩერება.....	6
ნაწილი 4.04. შეტყობინებები.....	6
ნაწილი 4.05. სამართლებრივი დასკვნა	6

პროექტის მხარდაჭერის ხელშეკრულება

ხელშეკრულება დათარიღებულია 2021 წლის [] და ფორმდება თბილისის მუნიციპალიტეტისა და ევროპის რეკონსტრუქციისა და განვითარების ბანკს (შემდგომში „ბანკი“) შორის.

ვინაიდან საქართველომ, თბილისის მუნიციპალიტეტმა და შპს „თბილისის სატრანსპორტო კომპანია“ (შემდგომში „პროექტის ორგანიზაცია“) ბანკისგან ითხოვეს დახმარება პროექტის დაფინანსების მიზნით,

ვინაიდან საქართველოსა (შემდგომში „მსესხებელი“) და ბანკს შორის დღევანდელი დღით დათარიღებული სასესხო ხელშეკრულების (შემდგომში სტანდარტულ პირობებში განსაზღვრული „სასესხო ხელშეკრულება“) შესაბამისად, ბანკი თანახმაა მსესხებელს გამოუყოს სესხი 83,000,000 ევროს ოდენობით, სასესხო ხელშეკრულებაში განსაზღვრული პირობების საფუძველზე იმ პირობით, რომ ქალაქ თბილისის მუნიციპალიტეტი პროექტის ორგანიზაციის სათანადო დახმარებას გაუწევს, რომ პროექტი წარმატებით განხორციელდეს წინამდებარე ხელშეკრულებაში განსაზღვრულის თანახმად;

ვინაიდან ბანკმა და პროექტის ორგანიზაციამ გააფორმეს პროექტის განხორციელების ხელშეკრულება და

ვინაიდან იმის გათვალისწინებით, რომ ბანკი სასესხო ხელშეკრულებას აფორმებს, ხოლო მსესხებელი - ქვესასესხო ხელშეკრულებას, ქალაქ თბილისის მუნიციპალიტეტი თანახმაა, წინამდებარე ხელშეკრულებაში განსაზღვრული ვალდებულებები იკისროს.

შესაბამისად, მხარეები თანხმდებიან შემდეგზე:

მუხლი I - სტანდარტული პირობები და ტერმინების განმარტებები

ნაწილი 1.01. სტანდარტული პირობების გათვალისწინება

(ა) ბანკის 2018 წლის 1 ოქტომბრით დათარიღებული სტანდარტული პირობების ყველა დებულება, სასესხო ხელშეკრულებაში შეტანილი ცვლილებებით აქვეა გათვალისწინებული და გამოიყენება წინამდებარე ხელშეკრულებაში იმავე ძალითა და ეფექტით, როგორც უშუალოდ აქ იქნებოდა სრულად განსაზღვრული (ხსენებული დებულებები ამგვარი სახეცვლილებით მოიაზრება „სტანდარტულ პირობებად“).

(ბ) სტანდარტული პირობების მიზნებისთვის, წინამდებარე ხელშეკრულება მიიჩნევა „საპროექტო ხელშეკრულებად“, ხოლო ქალაქ თბილისის მუნიციპალიტეტი - „პროექტის განმახორციელებელ ერთეულად“.

ნაწილი 1.02. ტერმინების განმარტებები

წინამდებარე ხელშეკრულებაში (მათ შორის პრეამბულაში) გამოყენებული ტერმინები იმ შემთხვევების გარდა, როდესაც კონტექსტი სხვაგვარად მოითხოვს, განმარტებულია პრეამბულაში მითითებული მნიშვნელობებით, ხოლო სტანდარტულ პირობებში, პროექტის განხორციელებისა და სასესხო ხელშეკრულებებში განსაზღვრული ტერმინები - იქვე მითითებული მნიშვნელობებით და ქვემოთ მოყვანილი ტერმინები განიმარტება შემდეგნაირად:

„საოპერაციო სალდო“

გულისხმობს ნებისმიერ ფისკალურ წელს დედაქალაქის მიმდინარე შემოსავლებს გამოკლებული მიმდინარე ხარჯები.

„ვალი“ გულისხმობს

ქალაქ თბილისის მუნიციპალიტეტის ყველა ვალდებულებას, რომელიც გამოხატულია არსებული, სამომავლო, ფაქტიური ან სავარაუდო ძირითადი თანხის ან თავდებობის სახით და მოიცავს თანხების გადახდას ან დაბრუნებას, მათ შორის:

(ა) ნებისმიერ თანხას, რომელსაც ქალაქ თბილისის მუნიციპალიტეტი შესაბამის პერიოდებში გადაიხდის იჯარისთვის ან მსგავსი მექანიზმისთვის;

(ბ) ქალაქ თბილისის მუნიციპალიტეტისთვის საქონლის მიწოდების მიერ მისაღები ნებისმიერი კრედიტი ან ნებისმიერი ნაწილის შესყიდვის ან მსგავსი ღონისძიებების ფარგლებში და

(გ) მესამე მხარისადმი ნაკისრი ნებისმიერი ვალდებულება, რომელიც გარანტირებულია ქალაქ თბილისის მუნიციპალიტეტის მიერ ან ქალაქ თბილისის მუნიციპალიტეტს სხვაგვარად აქვს ნაკისრი ვალდებულება მათ გადახდაზე, ასევე ქალაქ თბილისის მუნიციპალიტეტის საკუთრებაში არსებული ქონებით უზრუნველყოფილ ვალდებულებებზე იმისდა მიუხედავად ქალაქ თბილისის მუნიციპალიტეტის ამ ვალდებულების გადახდაზე აღებული აქვს თუ არა პასუხისმგებლობა.

„ფისკალური წელი“

გულისხმობს ქალაქ თბილისის მუნიციპალიტეტის ფისკალურ წელს, რომელიც იწყება ყოველი წლის 1 იანვარს და სრულდება 31 დეკემბერს.

„ინტეგრირებული ტარიფები და საჯარო მომსახურების კონტრაქტის განახლება“

გულისხმობს ბანკის მიერ დაფინანსებულ საკონსულტაციო მომსახურებას, რომლის მიზანია დაეხმაროს ქალაქს ინტეგრირებული ტარიფების შემოღებასა და საჯარო მომსახურების კონტრაქტის განახლებაში.

„მზარდაჭერა ურბანული ელექტრონული მობილობის საგზაო რუკის პროგრამის განვითარებაში“

გულისხმობს ბანკის მიერ დაფინანსებულ საკონსულტაციო მომსახურებას, რომლის მიზანია ქალაქისთვის ელექტრონული მობილობის, ელექტრონული მობილობის პოლიტიკის, ელექტრონული მობილობის ავტოპარკისა და ელექტრონული მობილობის სექტორების პოტენციალის გაცნობა, ბიზნეს კონცეფციების შემუშავება და შესაბამისი პოლიტიკის, მარეგულირებელი და ინსტიტუციური ქმედებების იდენტიფიცირება, რომლებიც ქალაქის მიერ შეიძლება განხორციელდეს.

ინტეგრირებული ტარიფების შემოღებასა და საჯარო მომსახურების კონტრაქტის განახლებაში.

ნაწილი 1.03. ინტერპრეტაცია

სხვაგვარად განსაზღვრული შემთხვევების გარდა, წინამდებარე ხელშეკრულების კონკრეტულ მუხლზე, ნაწილზე ან დანართზე მიმართება გულისხმობს უშუალოდ ამგვარ მუხლზე, ნაწილზე ან დანართზე მიმართებას.

ნაწილი 1.04. დასტური

ქალაქ თბილისის მუნიციპალიტეტს მიეწოდა და აქვე ადასტურებს სასესიო და პროექტის განხორციელების ხელშეკრულებების მიღებას.

II - მხარდაჭერის ვალდებულებები

ნაწილი 2.01. ქალაქ თბილისის მუნიციპალიტეტის მიერ ნაკისრი მხარდაჭერის ვალდებულებები

იმ შემთხვევების გარდა, როდესაც ბანკთან შესაძლოა სხვაგვარად შეთანხმდეს, ქალაქ თბილისის მუნიციპალიტეტი კანონით განსაზღვრული უფლებამოსილების ფარგლებში ყველა საჭირო საკანონმდებლო, მარეგულირებელ და სხვა სახის ზომას მიმართავს (და ბანკს დაუდასტურებს, რომ ხსენებულ ზომებს მიმართა), რათა პროექტის ორგანიზაციამ შეძლოს ფუნქციონირება და დროულად განახორციელოს ყველა ის ფინანსური და სხვა სახის ვალდებულება, რომელიც პროექტის განხორციელების ხელშეკრულებაში და საჯარო სერვისის კონტრაქტშია განსაზღვრული. ყოველივე ზემოთქმული გულისხმობს, თუმცა არ შემოიფარგლება შემდეგით:

- (1) ქალაქ თბილისის მუნიციპალიტეტმა მსესხებელთან უნდა გააფორმოს ქვესასესიო ხელშეკრულება და პროექტის ორგანიზაციისთვის ხელმისაწვდომი გახადოს ქვესასესიო ხელშეკრულებით გათვალისწინებული რესურსი;
- (2) წინამდებარე ხელშეკრულების ან სტანდარტული პირობების ზოგადი ხასიათის შეზღუდვის გარეშე ქალაქ თბილისის მუნიციპალიტეტმა საშუალება მისცეს პროექტის ორგანიზაციას, რათა მან საჭიროებისამებრ ხშირად მიიღოს გონივრული და ხელმისაწვდომი ზომები პროექტის ორგანიზაციის მგზავრობის საფასურის დონესა და სტრუქტურაში ცვლილებების შეტანის მიზნით ფინანსური ხელმისაწვდომობის ფარგლებში, იმის უზრუნველსაყოფად, რომ პროექტის ორგანიზაციამ შეძლოს პროექტის განხორციელების ხელშეკრულებაში განსაზღვრული მოთხოვნების შესრულება;
- (3) ქალაქ თბილისის მუნიციპალიტეტმა მხარი უნდა დაუჭიროს პროექტის ორგანიზაციას პროექტის განხორციელების ხელშეკრულებით ნაკისრი ვალდებულებების შესრულებაში ფინანსური რესურსის გამოყოფით ან უზრუნველყოფით და პროექტის განხორციელების ხელშეკრულების ფარგლებში პროექტის ორგანიზაციის მიერ ნაკისრი ფინანსური ვალდებულებების შესრულებაში მხარდაჭერის უზრუნველყოფით;
- (4) ქალაქ თბილისის მუნიციპალიტეტმა უნდა უზრუნველყოს, პროექტის ორგანიზაციის მიერ პროექტის განხორციელების ხელშეკრულების ფარგლებში ნაკისრი ვალდებულებების შესრულება;

- (5) როდესაც პროექტის განხორციელების ხელშეკრულების, ან საჯარო მომსახურების კონტრაქტის ფარგლებში პროექტის ორგანიზაციის მიერ ნაკისრი რომელიმე ვალდებულების შესრულება საჭიროებს ქალაქ თბილისის მუნიციპალიტეტის ან რომელიმე შესაბამისი უწყების ან ორგანოს ნებართვას, ქალაქ თბილისის მუნიციპალიტეტმა დროულად უნდა გასცეს ის (ან უზრუნველყოს შესაბამისი უწყების ან ორგანოს მიერ ხსენებული ნებართვის დროული გაცემა) შესაბამისი კანონის ფარგლებში;
- (6) ბანკის წინასწარი წერილობითი თანხმობის გარეშე ქალაქ თბილისის მუნიციპალიტეტმა არ უნდა (და უზრუნველყოს რომ არც პროექტის ორგანიზაციამ) მოახდინოს პროექტის ორგანიზაციის მიერ გამოყენებული აქტივების სრული ან მისი მნიშვნელოვანი ნაწილის გაყიდვა, გასხვისება, იჯარით გაცემა ან სხვაგვარი ხელყოფა (ერთჯერადად ან მრავლობითად, დაკავშირებული ან დაუკავშირებელი ოპერაციის განხორციელების გზით), რაც მისი საქმიანობის ეფექტური განხორციელებისთვისაა საჭირო ან რომლის ხელყოფაც შეიძლება, კითხვის ნიშნის ქვეშ აყენებდეს პროექტის განხორციელების ხელშეკრულების ფარგლებში ნაკისრი რომელიმე ვალდებულების დამაკმაყოფილებელი სახით განხორციელების შესაძლებლობას;
- (7) ქალაქ თბილისის მუნიციპალიტეტმა ხელი არ უნდა შეუშალოს პროექტის ორგანიზაციას საქართველოს კანონმდებლობის შესაბამისად მაკორექტირებელი ქმედების განხორციელება ნებისმიერი მისი მომხმარებლის მიმართ (მათ შორის, შეზღუდვის გარეშე, სამთავრობო და მუნიციპალური დეპარტამენტებსა, უწყებებსა და სახელმწიფო მფლობელობაში არსებული საწარმოებს), რომლებიც ვერ შეასრულებენ პროექტის ორგანიზაციის წინაშე ნაკისრ ფინანსურ ვალდებულებებს;
- (8) ქალაქ თბილისის მუნიციპალიტეტმა არ უნდა დაუშვას პროექტის ორგანიზაციის მიერ მის წესდებაში ცვლილებების შეტანა, შეწყვეტა ან გაუქმება ბანკის წინასწარი წერილობითი თანხმობის გარეშე, იმგვარად, რომ ამან მატერიალური და საზიანო გავლენა მოახდინოს პროექტის ორგანიზაციის საოპერაციო და ფინანსურ შესაძლებლობებზე ან უარყოფითად იმოქმედოს მის შესაძლებლობაზე, წარმატებით განახორციელოს პროექტი;
- (9) ბანკის წინასწარი წერილობითი თანხმობის გარეშე ქალაქ თბილისის მუნიციპალიტეტმა არ უნდა განახორციელოს რაიმე სახის ქმედება, რაც გავლენას იქონიებს საჯარო სერვისის კონტრაქტზე ან მისი რომელიმე დებულების ცვლილებების, გაუქმების, გასხვისების, შეწყვეტის ან მოხსნის სახით;
- (10) ქალაქ თბილისის მუნიციპალიტეტმა ყველა ზომას უნდა მიმართოს და განსაკუთრებით კი თავად მიიღოს ან უზრუნველყოს გარემოსდაცვითი და სოციალური სამოქმედო გეგმის განსახორციელებლად საჭირო ყველა მარეგულირებელი დოკუმენტის მიღება;
- (11) ქალაქ თბილისის მუნიციპალიტეტმა მუდმივად უნდა იზრუნოს პროექტის ორგანიზაციის მიერ სესხების ლიმიტის დაცვაზე, რათა ის არ გასცდეს პროექტის ორგანიზაციის წესდებით ან საქართველოს კანონმდებლობით განსაზღვრულ ზღვარს;
- (12) გაათავისუფლოს ადგილობრივი გადასახადებისა და მოსაკრებლებისაგან, რომელთა მოთხოვნის უფლებაც, საქართველოს კანონმდებლობის თანახმად ქალაქ თბილისის მუნიციპალიტეტს გააჩნია პროექტის ორგანიზაციის ან ქალაქ თბილისის მუნიციპალიტეტის მიერ შემენილი საქონელსა და სერვისებთან დაკავშირებით, რომელთა შემენაც მოხდა პროექტის ფარგლებში და დაფინანსებულია სესხის ან გრანტის თანხებით;
- (13) ქალაქ თბილისის მუნიციპალიტეტმა არ უნდა გაასხვისოს, გადასცეს ან სხვაგვარად ხელყოს პროექტის ორგანიზაციის საწესდებო კაპიტალი სრულად ან ნაწილობრვ, არც დაუშვას რაიმე სახის შერწყმა, გაერთიანება, რეორგანიზაცია ან ცვლილება პროექტის ორგანიზაციის იურიდიულ ფორმაში, ბენეფიციარულ მფლობელობაში ან კონტროლში, ბანკის წინასწარი თანხმობის გარეშე, იმგვარად, რომ ამან მატერიალური და საზიანო გავლენა მოახდინოს პროექტის ორგანიზაციის საოპერაციო და ფინანსური შესაძლებლობებზე ან უარყოფითად იმოქმედოს მის შესაძლებლობაზე, წარმატებით განახორციელოს პროექტი;

- (14) შეასრულოს მწვანე ქალაქების სამოქმედო გეგმა; და
(15) იმუშაოს იმ კონსულტანტებთან და განახორციელოს იმ კონსულტანტთა რეკომენდაციები, რომლებიც ჩართულები არიან შემდეგ პროგრამებში: „ინტეგრირებული ტარიფებისა და საჯარო მომსახურების კონტრაქტის განახლება“ და „მხარდაჭერა ურბანული ელექტრონული მობილობის საგზაო რუკის პროგრამის განვითარებაში“.

ნაწილი 2.02. ფინანსური ვალდებულებები

ქალაქ თბილისის მუნიციპალიტეტი არ უნდა გასცდეს საქართველოს მუნიციპალიტეტებისთვის ადგილობრივი კანონმდებლობით განსაზღვრულ სესხების ლიმიტს, სადაც ეს დროდადრო რელევანტურია.

ნაწილი 2.03. ქვესასესხო ხელშეკრულება

ქალაქ თბილისის მუნიციპალიტეტმა უნდა შეასრულოს ქვესასესხო ხელშეკრულებით მასზე დაკისრებული ყველა ვალდებულება. თუ ბანკთან სხვაგვარად არ არის შეთანხმებული, ქალაქ თბილისის მუნიციპალიტეტმა არ უნდა განახორციელოს ისეთი ქმედება, რაც იმოქმედებს ქვესასესხო ხელშეკრულებაზე ან პირობებზე ცვლილების, გაუქმების, გასხვისების ან ანულირების სახით.

ნაწილი 2.04. საჯარო მომსახურების კონტრაქტი

ქალაქ თბილისის მუნიციპალიტეტმა ნებისმიერ დროს უნდა შეასრულოს საჯარო მომსახურების კონტრაქტით გათვალისწინებული ვალდებულებები.

მუხლი III - ფინანსური და საოპერაციო ვალდებულებები

ნაწილი 3.01. ფინანსური აღრიცხვითობა და ანგარიშები

(ა) 2021 წლის 1 იანვრიდან დაწყებული და ყოველი მომდევნო ფისკალური წლისთვის ქალაქ თბილისის მუნიციპალიტეტმა ბანკს უნდა წარუდგინოს:

(1) ქალაქ თბილისის მუნიციპალიტეტის საბოლოო წლიური ბიუჯეტი, როგორც კი ხელმისაწვდომი გახდება საკრებულოს მიერ დამტკიცების შემდეგ;

(2) წინა ფისკალური წლისთვის ქალაქ თბილისის მუნიციპალიტეტის ბიუჯეტის შესრულების ანგარიში, როგორც კი ხელმისაწვდომი გახდება საკრებულოს მიერ დამტკიცების შემდეგ;

(3) წინა ფისკალური წლისთვის ქალაქ თბილისის მუნიციპალიტეტის ფინანსური ანგარიში მისი ფინანსური ვალის ასახვით ხსენებული ფისკალური წლის ბოლოსთვის, როგორც კი ხელმისაწვდომი გახდება.

(ბ) სანამ ბანკისგან სხვაგვარი შეტყობინება იქნება მიღებული, სამოქმედო ქვეყნის ოფიციალურ ენაზე ბანკს წარმოუდგინოს ნაწილში 3.01(ა) განსაზღვრული დოკუმენტები.

მუხლი IV- სხვადასხვა

ნაწილი 4.01. ეფექტურობა

წინამდებარე ხელშეკრულება ამოქმედდება და ძალაში იქნება სასესხო ხელშეკრულების ამოქმედების დღიდან მასში განსაზღვრული პირობების შესაბამისად.

ნაწილი 4.02. ხელშეკრულების მოქმედების შეწყვეტა

წინამდებარე ხელშეკრულების მოქმედება შეწყდება სასესხო ხელშეკრულების მოქმედების შეწყვეტის თარიღზე, მასში განსაზღვრული პირობების შესაბამისად.

ნაწილი 4.03. ხელშეკრულების გაუქმება და შეჩერება

სტანდარტული პირობების თავში VII განსაზღვრული გაუქმების ან შეჩერების დათქმის მიუხედავად, წინამდებარე ხელშეკრულების ყველა პირობა გააგრძელებს მოქმედებას სრული ძალითა და ეფექტით.

ნაწილი 4.04. შეტყობინებები

სტანდარტული პირობების ნაწილის 10.01 მიზნებისთვის განისაზღვრება შემდეგი მისამართები:

ქალაქ თბილისის მუნიციპალიტეტისთვის:

თბილისის მუნიციპალიტეტი
შარტავას ქ. N7
0160 თბილისი,
საქართველო

ადრესატი: ქალაქ თბილისის მუნიციპალიტეტის მერი
ტელ: +995 3222722222

ბანკისთვის:

ევროპის რეკონსტრუქციისა და განვითარების ბანკი
გაერთიანებული სამეფო, ლონდონი,
საფოსტო ინდექსი EC2A 2JN
საფონდო ბირჟის მოედანი N1

ადრესატი: საოპერაციო ადმინისტრაციული დეპარტამენტი
ფაქსი: +44-20-7338-6100

ნაწილი 4.05. სამართლებრივი დასკვნა

სასესხო ხელშეკრულების 5.02(გ) ნაწილის მიზნებისთვის, ქალაქ თბილისის მუნიციპალიტეტმა ბანკს უნდა მიაწოდოს ქალაქ თბილისის მუნიციპალიტეტის იურიდიული საქალაქო სამსახურის უფროსის მიერ მომზადებული სამართლებრივი დასკვნა/დასკვნები ან უზრუნველყოს მათი მიწოდება ბანკისთვის მისაღები ფორმითა და შინაარსით, სადაც ნაჩვენებია იქნება, რომ წინამდებარე ხელშეკრულება და ქვესასესხო ხელშეკრულება ნებადართული ან რატიფიცირებულია, ხელმოწერილი და მიწოდებულია ქალაქ თბილისის მუნიციპალიტეტის სახელით, წარმოადგენს ქმედით და იურიდიულად

სავალდებულო ძალის მქონე დოკუმენტს ქალაქ თბილისის მუნიციპალიტეტისთვის, რაც
აღსრულებს შესაბამისი პირობების შესაბამისად.

ზემოხსენებულზე თანხმობის დასტურად ხელშეკრულების მხარეები მათი ჯეროვანად უფლებამოსილი წარმომადგენლების საშუალებით ხელს აწერენ წინამდებარე ხელშეკრულებას სამ ეგზემპლარად, (რომელთაგან ორი რჩება ბანკს, ხოლო ერთი - ქალაქ თბილისის მუნიციპალიტეტს) თბილისში, საქართველოში ზემოთ პირველად მითითებულ დღესა და წელს.

თბილისის მუნიციპალიტეტი

ხელმოწერი: _____

სახელი, გვარი:

თანამდებობა:

ევროპის რეკონსტრუქციისა და განვითარების ბანკი

ხელმოწერი: _____

სახელი, გვარი:

თანამდებობა: